

14.08.2025

UKA2025/145

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Pisortat suliffeqarfiutaanni tamani inuttassarsiuussinerit suliamut tunngasumik piginnaasaqarnissaat piumasaqaataassaaq, kalaallit oqaasinik piginnaasaqarneq ilanngullugu kiisalu kalaallit kulturiannut kalaallillu inuiaqatigiivinut ilisimasaqarnissaat pillugit Naalakkersuisut Inatsisartunut inatsisissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Inatsimmut siunnersuut UKA2026-mi kingusinnerpaamik saqqummiunneqassaaq. (Inatsisartuni Naleqqap Gruppia, Naleraq)

Tunngavilersuutit:

Kalaallit oqaasii, kulturiat inuiaqatigiillu. Taakkuuku piumasaqaatigigivut Namminersorlutik Oqartussani atorfeqarumagaanni.

Kisianni, Namminersorlutik Oqartussat atorfinitsitsiniarnerminni kalaallit oqaasiinik piginnaasaqarnissamut, kiisalu kalaallit kulturiannut ilisimasaqarnissamut aamma kalaallit inuiaqatigiivinut ilisimasaqarnissamut¹ Naalakkersuisut ataanni inuttassarsiuussinerit tamarmik ajorluartumik unioqqutitsipput.

Naalakkersuisut erseqqissaassutigini kuugaluarpaat namminneq iluminni inuttassarsiuussinermi ersarissumik piumasaqaateqarnissaq, ilaatigut ilanngunneqarluni *”inuttalernerqanngitsunut atorfinitsitsinermi nalinnaasumik piginnaasanik piumasaqaateqarnissaq, soorlu suliamut tunngasumik kalaallit oqaasiinik piginnaasaqarnissaq, kiisalu kalaallit kulturiannik kalaallillu inuiaqatigiivinik ilisimasaqarnissaat ilanngullugu”*²

Kisianni Naalakkersuisut atorfinitsitsinerput piumasaqaat nalinnaasoq malinngilaat namminneerlutik suliniutigalugu aallartitarluartik.

Assersuutit amerlasuut akornanni tassaavoq atorfimmik inuttassarsiuussineq *”Siulittaasoqarfiup Naalakkersuisoqarfiani HR-imi ineriartortitsinermut allaffimmi pisortaq”* Siulittaasoqarfiup Naalakkersuisoqarfiata ataaniittoq, qinnuteqarnissamut

¹ Cirkulære om ansættelse af personale i centraladministrationen samt direktører i de nettostyrede virksomheder m.v. (2017)

² § 37 spørgsmål nr. 2018-008

kingusinnerpaamik killissarititaasoq ulloq 17. august 2025. Atorfimmik inuttassarsiuussinnermi erseqqissarneqanngilaq kalaallit oqaasiinik piginnaasaqarnissamut piumasaqaat, taamaallaalli allaqqalluni "iluqaqtaassaaq" kisiannili "piumasaqaataanani, tamanna uffa piumasaqaataagaluartoq. Inuttassarsiuussinnermi kalaallit kulturiannik kalaallillu inuiaqatigiivinit ilisimasaqarnissamut piumasaqaatit allaqqanatit. Taamaalillutik Naalakkersuisoqarfiit tamarmik Naalakkersuisut nammineq inuttassarsiuussinnermi piumasaqaatertit unioqqutippaat. Unioqqutitsinerit arlaqartut kinguneqartinneqanngitsulli.

Aalajangiinissamut siunnersuutip siunertaraa Naalakkersuisut inatsimmik siunnersuusiornissaat piumasaqaataassasoq, tassuunakkut kalaallit oqaasiinik piginnaasaqarnissamut piumasaqaateqalernissaq anguniarlugu, kiisalu kalaallit kulturiannut kalaallillu inuiaqatigiivinit ilisimasaqarnissaat, kaajallaasitami atuuttumi³ inatsisinngortinneqarnissaa ilaatigut allassimasooq. Inatsit pisortat iluanni tamarmi atuuttussaavoq pineqaatissiissutigineqartarluni unioqqutitsisoqartillugu.

Aalajangiiffigisassatut siunnersuutip atuutilersinneqarnerani taamaalilluni piumasaqaataanissaat Naalakkersuisut inatsimmik siunnersuuteqarnerminni immikkut akuersissuteqarsinnaanermut periarfissiineq, taamaalilluni pisortani atorfimmut inuttassarsiuukkamut pineqartumut qinnuteqartut – nammattumik – kalaallit oqaasiinik piginnaasaqanngikkaluarlutik, imaluunniit kalaallit kulturiannik kalaallillu inuiaqatigiivinit ilisimasaqanngikkaluarlutik aamma atorfinitsinneqarnissamut periarfissaqartut. Imikkut akuerineqarnissami piumasaqaataassaaq siullertut Naalakkersuisoqarfimmi pineqartumi akisussaasup allakkatigut akuersissuteqarneratigut, allakkatigut nassuiarlugu sooq piumasaqaataasoq unioqqutinneqarnersoq aamma immikkut akuersissut atorfimmut atuuttussamut ilanngullugu.

Taakku saniatigut Naalakkersuisut aalajangiiffigisassatut siunnersuummi inatsisissatut siunnersuummik atuutsitsilernissaanni ersarissumik immikkut piumasaqaatit allassimassapput aamma kalaallit oqaasiinik piginnaasat qinnuteqartup ilisimasassai ilanngullugit, kiisalu kalaallit kulturiannik kalaallillu inuiaqatigiivinit ilisimasaqarnissamut piumasaqarnissamut qaffasissuseq ilanngullugit.

Nuna inatsisitigut sananeqassaaq. Malittarisassat atuuttut tamatta pitsaanerusumik malissinnaagutsigit, taamaalilluta inatsisinik pitsaanerpaamik angorusutatsinnut qulakkeerinninnissaagut.

Oqaatsivut, kulturperput nunatsinni inuiaqatigiitsinnilu salliutinneqassapput.

³ Cirkulære om ansættelse af personale i centraladministrationen samt direktører i de nettostyrede virksomheder m.v. (2017)



Pisortanut aningaasatigut allaffissornikkullu kingunerisassai:

AC-ataatsip ukiup affaanut suliarisinnaasaasa naatsorsornerat kr. 250.000.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.